

Jamhuri ya Muungano wa Tanzania
OFISI YA RAIS
TAWALA ZA MIKOA NA SERIKALI ZA MITAA



HALMASHAURI YA WILAYA YA CHUNYA



IDARA YA KILIMO, UMWAGILIAJI NA USHIRIKA

MAWASILIANO:

S.L.P 107
Simu : 025 2520013
Nukushi : 025 2520240

CHUNYA

1.0 UTANGULIZI

Asilimia 87 ya wakazi wa Halmashauri ya Wilaya ya Chunya wanategemea kilimo na kilimo ndiyo huchangia kwa kiwango kikubwa sana uchumi wa Halmashauri.

Halmashauri hii inakadiriwa kuwa najumla ya eneo lenye ukubwa wa hekta 1,315,000 ambapo eneo linalofaa kwa kilimo linakadiriwa kuwa ni hekta 1,035,400 na jumla ya hekta 115, 770 ndizo zilizotumika kwa kilimo cha mazao ya chakula, biashara na bustani (mboga na matunda) katika msimu wa kilimo 2020/2021. Hata hivyo eneo linalolimwa hubadilika kila msimu kulingana na malengo ya wakulima na mwelekeo wa hali ya hewa.

Mazao ya chakula yanayolimwa ni Mahindi, Viazi vitamu, Maharage, Ulezi, Mtama, Mpunga, Muhogo na Kunde. Mazao ya biashara ni Tumbaku, Karanga, Alizeti, Ufuta na Choroko.

2.0 HALI YA HEWA

Halmashauri ya Wilaya ya Chunya ina wastani wa joto kati ya nyuzi za sentigredi 21 na 23. Halmashauri hii hupata aina moja ya mvua (Unimodal rainfall pattern) yenye wastani kati ya milimita 500 na 1000 kwa mwaka. Msimu wa mvua huanzia mwishoni mwa mwezi Oktoba hadi Aprili na kipindi chenye mvua nyingi ni kati ya mwezi Januari na Machi.

3.0 KANDA ZA MAZAO (AGRO – ECOLOGICAL ZONES)

Halmashauri ya Wilaya ya Chunya ina kanda kuu 2 nazo ni ukanda wa madini na ukanda wa miombo.

3.1 Ukanda wa madini : Ukanda huu unajumuisha maeneo yote ya Tarafa ya Kiwanja yenyе kata 11, vijiji 19 na mitaa 35. Mazao yanayolimwa ni Mahindi, Maharage, Mtama, Karanga, Viazi vitamu, Ulezi, Mihogo na Alizeti

3.2 Ukanda wa miombo : Ukanda huu unajumuisha maeneo yote ya Tarafa ya Kipembawe yenyе kata 9 na vijiji 24. Mazao yanayolimwa ni Mahindi, Tumbaku, Alizeti, Kunde, Choroko, Maharage, Mihogo, Viazi vitamu, Ulezi na Karanga

4.0 MALENGO YA IDARA

4.1 Lengo Kuu

Kuboresha huduma za kilimo ili kuchangia uhakika na usalama wa chakula na kupunguza umaskini wa kipato ifikapo 2025.

4.2 Malengo Mahususi

- i. Kuongeza tija ya uzalishaji kwa zao la mahindi kutoka 2.0 tani kwa hekta ya mwaka 2020 hadi 3.5 tani kwa hekta ifikapo 2025.
- ii. Kuongeza tija ya uzalishaji kwa zao la mtama kutoka 1.6 tani kwa hekta ya mwaka 2020 hadi 2.5 tani kwa hekta ifikapo 2025.
- iii. Kuongeza tija ya uzalishaji kwa zao la alizeti kutoka 1.8 tani kwa hekta ya mwaka 2020 hadi 2.5 tani kwa hekta ifikapo 2025.
- iv. Kuongeza eneo linalolimwa zao la alizeti kwa kaya kutoka hekta 1.5 ya mwaka 2020 hadi hekta 2.0 ifikapo 2025
- v. Kuongeza idadi ya vyama vya ushirika wa wakulima vilivyo sajiriwa kutoka 34 ya mwaka 2020 hadi 50 ifikapo 2025.
- vi. Kuongeza na kuboresha miundo mbinu ya kilimo ifikapo mwaka 2025

5.0 HUDUMA ZINAZOTOLEWA NA NJIA ZINAZOTUMIKA KATIKA KUTOA HUDUMA

5.1 Huduma zinazotolewa

Idara ya Kilimo, Umwagiliaji na Ushirika hutoa huduma zifuatazo:

- Kusimamia maandalizi na utekelezaji wa malengo ya uzalishaji wa mazao ya chakula, biashara na bustani (Mboga na Matunda).
- Kuelimisha wakulima mbinu bora za kilimo cha mazao ya chakula, biashara na bustani. Elimu itolewayo ni kanuni za kilimo bora, matumizi sahihi ya zana bora katika kuboresha kilimo kwa lengo la kuongeza uzalishaji, mbegu bora na matumizi sahihi ya mbolea.
- Kuelimisha wakulima juu ya matumizi sahihi ya viuatilifu na njia sahihi za udhibiti wa magonjwa ya mazao na wanyama waharibifu.
- Kuwatembelea wakulima, kuona changamoto wanazokutana nazo na kutoa ushauri wa jinsi ya kutatua changamoto hizo.
- Kuelimisha wakulima juu ya utayarishaji, usindikaji na hifadhi bora ya mazao baada ya mavuno pamoja na ukadriaji wa mahitaji ya chakula kwa mwaka katika ngazi ya kaya.
- Kutoa taarifa za maendeleo ya kilimo na hali ya chakula kila wakati ngazi ya Wilaya, Mkoa na Kitaifa
- Kuratibu na kufuatilia upatikanaji na usambazaji wa pembejeo za kilimo kwa kushirikiana na wadau mbalimbali kama vile makampuni ya pembejeo, mawakala na wasambazaji wa pembejeo.

- Kuratibu na kufuatalia upatikanaji na matumizi ya zana bora za kilimo kwa wakulima ikiwa ni pamoja na kutunza na kuweka takwimu za hali ya zana katika halmashauri.
- Kukusanya takwimu za kilimo kwa kila mwezi na kuzifikisha kwa wadau mbali mbali ikiwa ni pamoja na kutoa taarifa za kitaifa kwa mtandao uliunganishwa ujulikanao kama ‘Agricultural Routine Data System’ (ARDS).
- Kukusanya takwimu za upatikanaji na bei za mazao ya chakula na biashara katika masoko kila wiki na kila mwezi.
- Kusimamia, kufuatalia na kutathmini utekelezaji wa shughuli mbalimbali za Miradi ya Maendeleo ya Kilimo chini ya mpango wa kuendeleza sekta ya kilimo Wilayani (DADP's).
- Kwa kushirikiana na vituo vya utafiti vya Uyole na Kibaha idara inaendesha mashamba ya majoribio ya uzalishaji wa aina mbali mbali za viazi vitamu rangi ya chungwa (viazi lishe).
- Kuanzisha, kusimamia na kuendesha vituo vya mafunzo ya wakulima na wafugaji vya kata (Ward Agricultural Resource Centers).
- Kuhamasisha uanzishaji wa vikundi vya wakulima.
- Kuhamasisha uanzishwaji wa vyama vya ushirika, kusimamamia uendeshaji wa vyama vya ushirika, kufanya ukaguzi wa vyama vya ushirika na kutoa taarifa katika vyama, kusimamia mikutano mikuu ya vyama vya ushirika na kusaidia kutatua migogoro ya vyama vya ushirika kwa kuzingatia kanuni na sheria ya vyama vya ushirika.

5.2 Njia zinazotumiwa na Idara kutoa huduma

Idara hutumia njia mbali mbali katika kufikisha huduma za ugani kwa wananchi.

Njia hizo ni zifuatazo:

- Mafunzo kwa njia ya kutembelea wakulima mashambani
- Mafunzo kupitia vikundi na kuongea na vikundi
- Mafunzo kwa njia ya mabango na vipeperushi.
- Mafunzo kwa njia ya warsha na semina
- Mafunzo kwa njia ya mashamba ya mfano
- Mafunzo kwa njia ya mashamba darasa.
- Ziara za mafunzo nje na ndani ya wilaya
- Mafunzo kupitia maonesho mbalimbali kama vile maeneosho ya nane nane, siku ya wakulima n.k.
- Mafunzo kupitia vituo vya rasilimali za kilimo na mifugo vya kata (Ward Agricultural Resource Centre).

6.0: WATUMISHI

Hali ya watumishi katika idara ni kama ilivyoainishwa kwenye jedwali lifuatalo:

MAHALI	KADA	MAHITAJI	WALIOPO		UPUNGUFU
			Wanaume	Wanawake	
Makao	Afisa Kilimo	2	2	0	2
Makuu ya Halmashauri	Mhandisi wa Umwagiliaji	1	0	0	1
	Mpimaji (Surveyor)	2	0	0	2
	Fundi Sanifu wa Umwagiliaji na Ujenzi	2	0	0	2
	Mhandisi wa Kilimo	1	0	0	1
	Fundi Sanifu wa Zana za Kilimo	1	0	0	1
	Afisa Ushirika	5	2	0	3
	Jumla Ndogo	14	4	0	12
Vijiji na Kata	Afisa Kilimo Msaidizi	63	18	8	37
	Jumla Ndogo	63	18	8	37
	JUMLA KUU	77	22	8	49

7.0: MUUNDO WA IDARA

Idara ya Kilimo, Umwagiliaji na Ushirika ina vitengo vitano. Vitengo hivyo ni Huduma za ugani, Takwimu, Mazao, Umwagiliaji na Ushirika. Muundo wa Idara ni kama inavyoonekana kwenye mchoro ufuatao:

